

四庫全書

史部

欽定四庫全書

硃批諭旨卷一百七十四之十五

硃批李衛奏摺

雍正十一年正月十五日直隸總督臣李衛謹

奏為恭繳

御批附陳交代起程事竊臣自進京叩覲

天顏十有餘日荷蒙

皇恩得以親承

聖訓跪聆至理開導愚蒙使茅塞心曾畧有牖啓感戴
欣忭莫可名言臣隨於十二日出京星馳回保十
四日將緊要案件料理交代十五日送印後即起
程赴浙所有上年冬月先後兩次奉到

御批原奏摺七件理合恭繳其中直省應行查辦事件
以及邪教為首之人均有就獲解到者俱面與畧
協二臣唐執玉顧琮言明原委斟酌料理容臣回
任後逐一查明分晰覆

旨至臣屬員各有官守不敢多帶查清河同知楊灝於

工程熟練人亦明白有才此時本管河務無事暫
行帶往於夏汛之前即可回任兩無歧誤并舊有
直督衙門筆帖式二員內隨去玉麟一人稍供沿
途差遣之用相應一并附摺陳明伏乞

睿鑒為此謹

奏

浙省各員均係舊屬其才具諒所素悉可以任意指揮

直隸屬員似不須帶往若既束裝在道則亦已耳

雍正十一年四月十七日直隸總督臣李衛謹

奏為甘霖大沛四野霑足恭摺

奏報上慰

聖懷事竊照直隸西南各屬地方冬春雪雨畧少

皇上敬

天勤民虔誠祈禱已於三月二十六等日得有時雨而

聖心惟恐未能普徧屢頒

諭旨動支各縣存穀撥運北倉米石減價平糶將舊欠

錢糧

特命緩徵恤刑慎獄平允矜全浩蕩

洪恩有加無已今保定府一帶於本月十六日申時起
濃雲密布雷電交作初猶隨下隨止是夜子時大
沛滂沱纏綿稠密直至十七日巳時漸住而彤雲
深厚看來所及廣遠除別屬各縣現在飛查續報
外臣差員四郊履勘高下田畝俱各透足從此麥

秋兩熟可望豐收農夫鼓腹稱慶歡聲載道此誠
皇上實心實政徵應感孚呼吸可通捷於影響億萬蒼
生皆蒙

福佑臣等文武各官曷勝欣忭之至為此先行繕摺奏
聞伏乞

睿鑒謹

奏

保陽一帶得雨情形以手加額覽焉

雍正十一年四月二十日直隸總督_臣李衛謹

奏為奏

聞事竊

_臣

於回京入境之初途間即聞有旗人白二邪

術惑人在涿州發覺查拏逃遁未獲

_臣

料其必於

水路及屯莊口外潛踪以避耳目凡遇文武屬員

即密令彼此知會上緊設法務獲姦宄以除民害

今據天津縣知縣徐而發稟稱本月十六日差役

在該縣地方王家莊飯舖內見有買酒之人形迹

可疑隨同昌平州差役盤詰拏住訊據自認係白馬亮即趙鴻亮現已撥兵護解來保等因臣隨面諭竇啓瑛差員星飛迎去沿途小心看管押解到日究審外事關

持旨嚴拏要犯理合先行

奏報謹

奏

此犯就獲甚屬可嘉該縣令及捕役人等亟應從優獎

賞以示鼓勵

雍正十一年五月十五日直隸總督臣李衛謹

奏為敬陳管見恭請

睿裁事竊查直隸近年於提標宣化鎮張家口龍門獨石等營添兵五千四百名此誠

國家慎重邊防儲備勁旅深謀至計臣又何敢妄議惟是淺陋之識營伍重費餉糈多一兵必實在得一兵之用方為有益今聞從前因急於足數所收

新兵其中雖有壯健勇幹之人亦有軟弱油滑懶學技藝者此等人在營亦算一兵若欲望其遇事調遣勇敢向前恐不易得而官兵俸餉米折馬乾以及買馬製械等項即雍正十年一歲而論已在藩庫支給過銀二十二萬五千七百餘兩尚有建造營房共約需銀十萬兩嗣後有閏無閏計算餉米十七八萬餘兩歲歲皆有錢糧關係不可不為籌及況前項兵丁防守地方者少存營操練者多

原備調遣之用又臣標奉

旨募兵二千名在保訓練現在詳慎選擇精壯者充伍
若再於提標所添一千六百名內挑留一千名宣
鎮所添一千五百七十名內挑留一千名將此四
千人仍在三處各加訓練使成精銳即有調遣亦
可敷用應否趁此營房未經建造之時仰請

特遣大臣前往會同該提鎮將所招新兵逐一詳加選
擇其軟弱無用之人即行開糧歸農其精壯堪用

者於沿邊各口路營堡原額兵少之處將已添者酌留若干未添者撥增若干務使處處嚴密至於內地各營亦有兵額不敷防範難周之處俱應查明分別多寡量為增補其餘皆可裁汰一轉移間通省皆得整齊調遣仍無貽誤庶幾均收實用餉不虛糜仰惟

皇上聖明自有高遠卓識出於尋常萬萬者臣淺陋愚昧偶有所知據實陳明如或可行容臣會商提鎮

諸臣樽節勻派妥協分晰具題伏候

睿鑒訓示方敢欽遵辦理謹

奏

另有諭旨頒發候示到遵行

雍正十一年六月初六日直隸總督臣李衛謹

奏為遵

旨覆奏事本月初四日戌刻接到大學士鄂爾泰張廷

玉寄信蒙

皇上以江南副將李連是否克勝溫州總兵之任

詢問及臣遵查得李連老成勤謹歷練營務誠如

聖諭尚堪擢用但係北方之人未嫻水師若在陸路簡
地總兵似可勝任溫州閩浙接壤山海交錯一年
兩次出洋督巡會哨若總兵官於海面船務未諳
則差遣兵弁未免陽奉陰違不能稽核雖現今洋
道寧謐臣實未敢深信其人地相宜此溫州鎮員
缺恐致猶煩

聖心再四籌酌查有陳倫炯世習水師歷任有年前因
臺灣要地不便移動今思水師總兵原難多得若
閩省欲求一好副將轉移之間諒不至於乏人是
否可用恭候

睿鑒欽定謹

奏

臺灣要地陳倫炯何可移動卿意中既無勝任之人另
旨命浙閩督撫選舉耳

同日又

奏為愚衷難遏冒昧瀆陳仰祈

睿鑒事本月初三日接准部文

廷議勇健營兵丁一事臣查此挑汰驕悍不法兵丁

給與路費口糧止於遞回原籍不行治罪其支領

過餉米

恩賞銀兩等項槩不向本人名下是問此誠

國家寬大洪恩伊等尚有何辭而不樂從惟是前項

兵丁原係十八省督撫挑送今發回三百二十九名存留一千二百二十五名則此十八處之各府州縣皆有其人伊等回家之後彼存留兵丁之父兄妻子見伊等回來骨肉團聚又未追其領過銀兩而已之夫男兄弟身既遠離鄉井又因借支備辦出口物件即奉有

廷議部丈將其養贍家口錢糧全行扣除將謂

國家賞罰不公儻或十八省之人紛紛傳論有關

聖主多年政治聲名且此猶就在內家屬而言至留調
軍營之兵丁等聞知發回之人轉得受用而已身
在外家口有此艱難情狀必將志氣墮頽減其勇
往之心定議大臣豈不計及於此無非始終欲實
前言之不謬臣不知其是誠何心又如各省督撫
挑送不慎追賠領過錢糧等項咎實難辭臣於浙
省發回共有五名應賠不過數百餘兩但各省尚
有多者即如直隸一處而論汰回四十四名應追

賠數千餘兩已故署督唐執玉雖無功績足錄今
現累及子孫固其自取但上年在京勇健到齊時
交臣管理操演技藝曾面奏內有軟弱不堪之人
請遣大臣挑選去留當蒙

皇上令臣與栢之藩細加考驗臣等遵

旨逐一考驗分別等第將軟弱老病者共挑出三百三
十六名發回各本處內惟湖北湖南廣西三省多
皆軟弱不堪毫不知技藝之人臣等以本案原奉

有通行

明旨倘以不應選送之人草率塞責將來考驗之日將該督撫從重議處欽此臣等不敢徇隱回奏時將此三省列為末等聲明指叅經大臣

廷議止於請

旨飭行伏思除廣西邊省人材本質平常且離總督駐劄遙遠情尚可原若楚人素稱剽健湖北又係督撫同挑即湖南起送亦必經由武昌為大臣者豈

不寓目而如此藐視玩忽且兩省二百二十人中
竟有不堪至九十六名之多較之今番在陝挑回
非因軟弱塞責而貽累子孫者其過孰重孰輕乃
置從重議處之

明旨於不問而但以飭行二字了結又不將支過餉銀
等項議令賠還恐將來封疆大吏遇事漸行躲閃
推諉實有關於風氣人心不淺也臣愚以為在陝
汰回不法兵丁所得過

皇賞各項銀兩於各督撫罰賠之外仍應於本犯名下
照數勒追賞給本省軍前出兵勇健家口其湖北
湖南督撫及廣西巡撫將軟弱無用之人濫送塞
責虛糜公帑亦應一例追出還項庶持法公平政
令畫一以昭

聖朝蕩平正直之治人心更加悅服矣臣明知此奏結
怨更深於己大有不便然身受

皇上天高地厚之恩至深極重用敢冒昧密陳伏祈

聖明鑒察謹

奏

所論固是然其中亦有差謬之處覽奏知道了

雍正十一年六月十五日直隸總督臣李衛謹

奏為敬陳地方控制事宜恭請

聖訓指示遵行事竊惟設官分職自應因地制宜更須
隨時籌畫從前直隸地方水利不修民間田廬時
多淹浸蒙

皇上念切痼瘵

特命賢王徧歷畿甸相度經營改設河道分為四局各
任督理工程責成既專宣防得法八年以後河流
安軌農工聿興淤墊漸已疏通規畫臻於美善今
又特設河臣二員總成於上印河各官趨事於下
近日之各河道較前逐漸不同事務稍簡則地方
控制事宜似又當因時斟酌而就近兼理者矣查
直隸全省州縣一百四十餘處守巡止有霸昌口

北二道霸昌自歸并通永所屬共轄二十六州縣
雖刑名分於四路同知而督緝之責與夫一應錢
糧出入銷算盤查俱由該道管理鞭長不及每致
率漏而口北道又止督催宣化一府錢糧刑名緝
捕等事除張家口同知承審之案其餘俱非經營
他如天津河間南北要衝河海交匯官疲役玩盜
熾民刁保定正定永平地廣人繁旗民雜處邊關
隘口是處險要知府之上均無道員稽督而更有

最切要者順廣大三府為

畿南重鎮界連晉豫山左舊有之大名道業已裁汰

臣自抵任以來稔知三府廣袤寬遠無大員統轄
久欲

奏請復設專道彈壓其間近又准巡察科

臣帥念祖

咨札會商眾議僉同請將大名等三府復設一道

駐劄原署照舊管理職掌事務此外自正定直至

天津皆係各河道所轄水利地方已有規模此時

情形與初辦事務繁簡不同可否將巡道責成就
近歸與各員兼管不須另設兩無歧誤一轉移間
於賢王經畫章程毫無更改而通省地方俱得整
頓且使各河道呼應更靈於工程大有裨益臣不
敢冒昧具題是以先行密陳請

旨如蒙

俞允再將分派各府州一切事宜另行詳細

題明遵奉辦理再查直隸府州縣佐貳雖多半皆

係河員不管地方之事即如在保定府駐劄者除理事廳外止有總捕同知一員終年出差在署日少事務繁劇惟餘知府一人實難分身兼辦查從前原有糧馬通判一員改設移駐通州不與郡務請於保定府復設糧捕通判一員分任督緝差查等事庶免周章又天津一府係新設地方沿海沿河疆域遼濶勢難周到原設之糧捕通判近又經鹽_臣鄂禮題請改為專管鹽務移駐支場雖將捕

務歸併海防河務同知兼理難以遙制應請復設糧捕通判一員分駐滄州督理迤南各州縣捕務方無叢脞其餘河間等屬運道一帶地方應酌量分派沿河丞倅就近兼管稽察臣現於改設巡檢案內另行分別具

題不敢繁冗瑣瀆以上事宜均關地方要務是否可行伏祈

聖明訓示欽遵謹

奏

直隸地方實屬遼濶河道兼巡併添設道廳之議俱是具疏題請可也

雍正十一年六月二十九日直隸總督臣李衛謹奏為

奏明事竊臣於本月二十日接准兵部咨文內開

命臣前往會同提督查閱沿邊新添兵丁分別裁存等因臣即於本日飛咨提臣路振揚并作札相訂各

起程日期在張家口會齊挑選起由獨石龍門等處至古北口看竣定議回京具

奏復

命

臣出紫荆關直赴張家口又可查看邊關一帶要隘

形勢去後原擬二十七日即可動身臣一面將地

方要務並查審事件連日趲辦分別題咨完結乃

於二十八日據提督會稿差弁到保問及伊於二

十三日來時提督尚未接到臣咨則是為沿途雨

水所阻竟致往回稽遲

臣

心不勝急躁除一面差

回飛催外不論何日覆到

臣

必定於初三日早行

統俟辦理完日面請

聖訓欽遵謹

奏

何須如此急促誠可謂躁矣

雍正十一年八月十六日直隸總督

臣

李衛謹

奏為奏

聞地方實在情事竊臣奉差事竣回京復

命於本月初六初七二日面承

聖訓指示一切即令回任臣欽遵隨於初八日起程沿

途目擊秋成俱好初十日已抵保定接印受事檢

查案卷據報被水偏災州縣雖共有六十餘處其

中惟迤東之寶坻寧河通州玉田武清及附近運

河之景州吳橋東光天津滄州南皮靜海鹽山慶

雲并任縣南和寧津邯鄲魏縣等處較為稍重其

餘間有被淹并低窪村莊處所無多以及水退尚輕之處雖均屬偏災而本戶田禾傷損或房屋衝壞則窮民口食自屬艱難仰荷

皇上如天之仁屢頒

恩旨動支倉庫賑恤署督臣顧琮已經奉行臣又欽遵

奏准

諭旨分咨營田觀察使臣顧琮陳儀巡農部臣舒喜派定迤東畿南沿河三路地方分頭前往開賑之處

督率稽查務令小民均霑實惠毋遺毋濫一面速
催勘明分別情形另疏具

題各去後所可慶者本年夏間甘雨及時直隸通省
禾苗穀黍原皆倍常暢茂今未曾被水各州縣所
報約畧收成俱自十分九分最少亦有七八分不
等而南府更勝即間被偏災各屬不但高阜之處
與低窪迥然不同凡平地水所不到者土經久晴
晒透復得伏雨滋潤禾苗茂盛結穗豐實收成倍

於往年是直隸雖有偏災動用倉儲不無繁費若以全省計之被水者不及十之二三高阜之處收穫倍多是以米價甚平民情相安尚可毋厯

睿懷臣仰體

聖主愛民至意自當盡心竭力隨時調劑斷不敢稍有粉飾相應據實奏

聞謹

奏

被災戶口既不至於失所而通省秋成又復倍常欣慰之懷莫可言喻

雍正十一年九月初三日直隸總督

臣李衛謹

奏為恭請

聖鑒事竊惟吏治賢否有關民生

臣欽遵

諭訓刻思整頓先將所屬府州縣等官悉心甄別分晰
參調其各道大員前經具

題請兼巡道職掌更有關乎地方責成敢不逐一察

覈據實奏

王廣益才具原屬平庸因不得勝任之人將就用者
聞查天津河道王廣益人本軟弱過於老實身列方面

在任數年於河工終未諳曉毫無展布若再加以

亦係碌碌庸員

巡道職任究成虛設又霸昌道戴綸外貌雖似去

得而家本素封性好安逸不肯實心勇往且才識

粗疎案件每多率漏自臣到任以來惟詳過燒鍋

數件塞責從未見有貪官污吏棍匪等項由該道

發覺一事何以表率屬吏整飭地方此二員者因

現無營私骭法劣蹟故未即列彈章然於繁劇監
司均難稱職應否改調簡僻之任抑或因其謹守
循分以京職備員之處臣未敢冒昧恭候

行即有旨諭部

聖明鑒定施行再如畿南漳河多係民埝舊堤每年夏
秋一遇山水驟發勢大而猛州縣各顧本處未能
齊心保護雖有漳河同知一員常至顧此失彼而
清河道相去遙遠鞭長莫及是以臣前請以順廣
大三郡河工分歸於復設之大名道就近辦理但

恐新任之員未即熟諳查現任清河道宋韋金雖
非肆應長才然其人誠謹小心於漳河形勢已歷
數年而大名等三府民情與伊原籍河南無異可
否以之調補復設之大名道將全漳河務責成專
為辦理於地方河工似覺相宜如蒙

俞允其漳河分巡道一缺恭候

簡補抑或在知府中選擇請

旨欽定臣未敢擅便謹具摺陳明伏候

聖鑒謹

奏

覽奏俱悉

雍正十一年九月十三日直隸總督臣李衛謹

奏為恭報秋禾實在收成分數事竊查直屬地方今年春雨畧稀荷蒙

皇上念切民依虔誠祈禱入夏以來甘霖疊沛遠近霑足秋禾暢茂茲據布政使王謩轉據各道府州將

實在收成分數查明具報前來除近河州縣數處
低窪村莊間有被水其餘高阜平地處所全省早
晚禾稼已獲豐收俱自十分九分以及七八分不
等臣謹另單分晰奏

聞外再查近河州縣內凡水所不到之處其收成亦各
有九分七八分至經水一過浸泡未久者尚有
三
四五六分不等所有現在被淹村莊經前署督

臣

顧琮及臣欽遵

諭旨逐處委員核實賑恤務令窮黎得沾實惠并將被
水地畝勘明具

題合併聲明伏祈

呈上睿鑒謹

奏

覽收成分數深為額慶其被水窮黎務令均沾實惠毋
致失所

雍正十一年九月二十日直隸總督臣李衛謹

奏為奏

聞拏獲飛賊事竊照

畿南一帶素為巨窩積匪潛藏之數臣留心已久設

法訪緝先於冀深二州東鹿衡水兩縣接壤處所

拏獲窩家積賊首犯謝大丕等七名并餘黨多人

現在分別治罪又臣於先後兩次回任時俱訪聞

有山陝一班飛賊響盜潛入境內為害地方臣隨

即密飭各屬令其預加防範查拏去後於本月十

六日據獻縣知縣明晟稟稱遵即遍加躡緝近有
從前充發大盜李自洪從陝西逃回帶有劇賊多
人窩在饒陽縣大邵村武生牛四即牛雲叢家武
藝高強人不敢近外縣差役難以捕獲臣即密差
新營署守備千總韓景琦挑選枝勇之千把外委
傅魁李蒼明等共十人兩路帶領前去設法擒拏
於十九日子時到彼訪知盜等正在窺伺欲刦貢
生冉昌後家去弁當即掩捕盜等拒敵格鬪多時

幸弁目竭力用命擊落賊械傅魁首先力擒巨盜
李自洪即李三吳禿子二名其餘分手拏住未得
走脫一人今據差員牛朝棟回報將各犯撥兵嚴
押解省根究夥黨逐一密拏務淨根株以除民害
相應附摺奏

聞謹

奏

剷除積窩密拏劇賊以除地方之害朕實深為嘉與直

隸盜風從此可望漸熄矣

又密奏鄂爾奇一摺尤屬可嘉苟非深悉朕衷毫不瞻顧安肯毅然直陳但若從內發擿事屬無因殊與政體有關且衆口囂囂亦必猜度及卿反不如公然指叅名正言順亦見當代有如是剛方大臣也原摺暫為留中俟卿彈章到日簡命果親王等公正王大臣數人察審真偽何能遁逃從前王士俊叅其妄提人犯等事朕已嚴加呵責大低伊秉性迂執而又悻悻自用較之乃兄

鄂爾泰不啻霄壤之分向日屢曾戒飭甚至加以夏楚
尚未料乖謬至於此極也覽奏獎許之懷筆莫能罄

雍正十一年九月二十二日直隸總督

臣

李衛謹

奏為遵

旨覆奏事竊

臣

接准吏部咨文欽奉

諭旨天津河道霸昌道清河道三缺著詢問李衛若屬
員內有可以題補之人即行題補如不得人據實回
奏欽此欽遵查直隸各道蒙

恩俞允俱兼理巡道職掌望其整頓非比從前專司河
務一事如清河道所轄保定正定二府五州道路
遼濶責任綦重直屬知府中才具出衆者頗少查
有保定府知府彭人瑛居官正氣持重老成在保
定府屬歷任已久民情風土頗為諳悉於清河一
缺人地相宜似可勝任其霸昌道員缺所屬州縣
皆係官民旗漢雜處非明敏風力不畏嫌怨之員
難膺斯任現在直屬員中更少惟見永平府知府

吳士端年富力強人尚明白稍有才情原係玉田
縣知縣近京一帶民情熟諳於霸昌道亦可勉力
供職但臣恐其人周旋世故若論強幹有為勇往
直前則莫若浙江台州府知府張坦熊更為勝之
至天津道員缺較清河霸昌所轄地方畧少民情
既更刁健河務紛繁必得諳曉水利之員方足兼
任臣遍加思維一時實難其人不敢冒昧輕舉可
否將彭人瑛吳士端二員送京引

見恭候

皇上察其人才高下於張坦熊三人之內

欽定酌用其天津河道或賜

特簡或令南北河臣再舉所知以備採用

臣

因先行請

旨未敢具本伏候

聖鑒欽遵為此謹

奏

天津道一缺朕謂張坦熊可以勝任即以之補授矣彭

人瑛吳士端已照所請諭部其所遺保定永平二缺命卿遞行題補亦俱有旨矣地方但以得人為要應陞與否在所不拘部文到日斟酌妥確仍先摺奏以聞

雍正十一年十月初七日直隸總督臣李衛謹
奏為請

旨事竊臣前遵

旨覆奏揀選清河霸昌天津各道員缺一摺於本年九月二十五日奉有

硃批今於九月二十九日又准到吏部咨文臣敢不悉

心秉公詳慎揀選查有正定府同知宋壽圖人頗

明白辦事向前易州知州呂守曾勤謹誠實勇於

任事此二員者俱堪知府之選臣就其入地詳加

斟酌宋壽圖才具已經試驗若用於保定更可就

近隨時教導使其歷練呂守曾年富力强正可於

繁劇之地宣勞出力永平府雖係京東要區亦有

軍需事務然較之宣化則永平事又畧簡現在宣

化知府馬益誠謹老練人畧忠厚可以調補永平府將呂守曾請補宣化府使之經理軍需彼此人地更為相宜其易州員缺臣查有保定府清苑縣知縣徐德泰才具去得人亦勤敏堪以陞補易州之任徐德泰所遺員缺頗難其人查有題署新城縣之試用官張德榮屢差辦公皆能盡心妥協人亦明白請以張德榮改署清苑縣試看如能稱職另請實授緣保永宣三府均係

畿輔重地及料理軍需要缺臣不敢擅專為此遵
旨先行繕摺具

奏恭候

御批到日方敢用本將各員送部引

見欽定伏乞

睿鑒訓示欽遵謹

奏

照此題請各員隨本送部引見

路振揚何如人耶密奏以聞

雍正十一年十一月初二日直隸總督

臣

李衛謹

奏為恭報瑞雪普徧事竊照直隸各州縣本年秋末
冬初凡高阜之處以及次等窪地悉皆播種冬麥
比舊甚廣滋長發生菁葱徧野本月初一日據大
興宛平等近京十餘州縣報到已於二十七日皆
得瑞雪今保定府一帶係二十九日自午時及夜
以至次早瑞雪續紛近省一二百里地方高下各

有四五六寸之深陸續呈報所及必廣現在天氣
和霽麥苗得此瑞雪滋生之氣融結於根收斂充
實精液飽足冬月凝凍土膏滋潤春來長養倍得
發榮一切風雨遲早皆無足虞即最窪之地留種
春麥者亦得沾濡普被實來歲豐登之兆可望大
有此皆仰邀

皇上福庇至德感孚是以恭逢

萬壽之辰

天降瑞雪之慶臣民共霑歡呼感戴為此繕摺奏

聞伏祈

睿鑒謹

奏

瑞雪固為可慶但何庸如此誇張

雍正十一年十一月二十四日直隸總督

臣

李衛

謹

奏為續報各屬得雪普遍日期事竊照近省地方於

十月二十九日降有瑞雪業經具摺奏

聞今陸續據各州縣申報於十月二十七八九及十一月初一初二初七初八十五十六等日各得瑞雪四五六七寸不等而西山一帶往南之處雪深尺餘仲冬之半已經數次降瑞各處均霑實為可慶理合繕摺續報上慰

宸衷再據定州新樂縣知縣劉師健詳稱本年十一月十三日辰時仰見天朗氣清日抱雙珥左右環拱

彩雲重護五色繽紛自辰至已經久光明闔城官
吏士民衆目環視咸稱嘉應

欽差侍郎陳樹萱經過所見相同等因到臣欽惟

皇上德周天壤靈應畢呈茲當長至節前得覩日抱雙
珥是誠

盛德感召之嘉徵臣仰體

聖意譙冲不言祥瑞未敢具疏慶

賀而地方有此庶徵相應一并附摺奏

聞謹

奏

日抱雙珥朕殊不以為麻徵

天恩錫祐冬雪應時是乃真祥瑞也宜歲宜民可慶可賀

同日又

奏為奏明河凍阻運設法辦理賑務事竊照直屬蒙

恩賑濟偏災一案

臣

於九月十三日會同查賑部

臣舒

喜議將通倉七八成色陳米撥運發賑具摺

欽定四庫全書

殊批諭旨

卷一百七十四之十五

三十一

奏請當經奉

旨該部會同倉場議奏欽此續經戶部定議題覆荷蒙
聖恩俞允臣於十月二十一日接閱邸鈔先即飛行飭
令各州縣預備妥當船脚赴通等候部文一到即
行開運及至二十七日接有知照部文復飛催星
速趲運奈時已仲冬米至十萬又非數日之間可
以盤量裝載不意適遇連日嚴寒十一月初八九
日北運河水淺易於冰凍有已裝未開有已開未

到雖打冰前進旋即復合且更有未經領出者難以轉運查濱河應領通倉賑米者共十一州縣除離通水路遠而陸路較近之寶坻玉田薊州寧河香河等處水旱腳價不甚相懸尚可用車輛裝運河間東光二縣需米無多另撥就近倉米應賑外惟天津所屬之靜海滄州鹽山慶雲等處共應領米三萬四千餘石議由河路運回分別重輕於年前先給三箇月或兩月餘俟來年青黃不接再看

情形請

旨今因河凍難運若盡行起旱則陸路脚價所費不貲
且恐時日稽遲事關窮民待哺臣心不勝惶急隨
與布政司商議已委深州知州俞士恒星夜前往
天津會同知府李梅賓將天津北倉零存陳米并
預令津軍同知買備米石查明盡數撥用不敷者
在於天津沿河等處設法竭力分頭採買務足年
前先賑兩月或一箇半月之數就近分發各處接

濟續賑令其到南運河再看水深冰若不厚則敲
凌水運或用托床拉送否則陸路較通倉頗近猶
可節省脚費其買米之銀查有從前減糶截漕米
價一萬餘兩原為買補備賑之用以之撥動免於
多費帑項其餘米石年前可以畧緩者俟來春查
明應領若干照數續行撥運今據差員回稟已照
依設法趕辦幸而天津等處商賈雲集米價不至
過昂就近購買可得尚不至於貽誤賑務所有河

冰凍阻不得不為變通辦理緣由據實

奏明仰祈

睿鑒謹

奏

權宜辦理是當之至待哺窮黎得以度此隆冬朕心深
慰仍咨明戶部倉場可也

同日又

奏為請

旨遵行事竊照直隸大名知府章培基經臣

題叅勒令休致其員缺前蒙

皇上俞准部議令臣於直屬現任同知內揀選正陪送

部引

見恭候

欽定臣查直隸現任同知知州內原有正定府同知宋

壽圖易州知州呂守曾等數員猶堪表率之任因

有保定宣化等府緊要缺出經臣將宋壽圖等題

送引

見荷蒙

聖恩俱准補用此外雖有保定府清河同知楊灝才具
去得但於大名遠府人地尚未相當查河間府知
府李璵前因原任失察屬員註誤蒙

恩帶所降之級從寬留任該員老成謹慎人亦樸實然
理繁治劇仍少肆應之才河間為南北衝途所轄
州縣多有衝繁疲難之缺兼係河工要地李璵竭

蹶辦理終覺勉強大名府雖係畿南要區尚非刁

疲繁難之處若得誠謹之員亦堪辦理無誤可否

河間

衝繁原與李璵不宜調補大名甚屬允當

請以李璵調補大名府似為人地相宜至河間府

員缺實係緊要清河同知楊灝頗有才情且駐劄

雄縣於河間民情河務甚為熟悉原屬五年俸滿

應陞之員但係知州借補同知現經部議部議不准論

缺陞

轉自屬常例若為人材起見則又不拘資格即越

缺陞轉又係直隸定州曲陽縣人於例未符臣何

級題

補亦復何礙但楊灝本籍定州於河間太近殊有

敢冒昧具

金

卷一百七十四之十五

未便此缺當另行酌擬具奏

題實緣地方需員謹據實聲明請

旨可否將楊灝送部帶領引

見恭候

聖明察其人才如或去得暫令署理看其果能稱職再行

題補倘尚未可即用懇求將河間府缺一并

得行揀選幹員以之補授固不待言矣若以中平才具發來試用縱勤加訓勵一二載間未必即能熟諳政務裨益

西路捕盜同知陳奏章因前任清苑縣失察吏員

地方也

出結部議革職奉

旨令臣將伊居官如何之處出具考語送部引

見奉有

諭旨交臣以同知以下等官委署試用臣伏讀之下似

朕日

同知亦在其中現今出有正定府同知一缺地方

在應

同知前所降之旨原有同知以下等官字樣同知自亦

衝繁督捕差遣亦須幹員查陳奏章老成歷練實

堪驅策可否即以該員委署看其更能奮勵加意

向前再請實授之處臣未敢擅便相應附摺陳明

請

旨伏候

訓示欽遵辦理謹

奏

覽

雍正十一年十二月初四日直隸總督臣李衛謹

奏為請

旨事竊臣前因直屬地方遼濶事務殷繁佐雜差委之

員又於敬籌衝要等事案內添改巡檢等官更需
遴選委用業於本年十月十一日繕疏

題請懇

恩敕部將候選候補等官揀發佐貳十員雜職二十員
在案但思在部候選佐雜非由考職即屬捐納多
係初任候補者少必俟到來分派地方始能漸次
熟練臣查

京師五城設立各鋪巡檢一項原經吏部都察院衙

門挑選請


旨補用者即蘆溝橋諸處亦有此等巡檢分管今已三年任滿將舊官掣回現在吏部分別等第叙用候補其中俱係佐貳微員厯練有年可否於此中擇其各城開列一二等者歸入臣所請人員數內并給其餘再於候補候選之中揀發則較之初任試用者實於地方事務更有裨益臣愚昧之見未知當否仰祈

聖明睿鑒施行為此繕摺

奏請謹

奏

俟該部揀選各員帶領引見時酌奪佐雜頗不乏人何必指定此一項耶



硃批諭旨卷一百七十四之十五

欽定四庫全書

硃批諭旨卷一百七十四之十六

史部

詳校官尚書_臣德保

編修_臣裴謙覆勘

總校官中書_臣朱鈐

校對官助教_臣胡予襄

謄錄監生_臣吳紹昆

欽定四庫全書

硃批諭旨卷一百七十四之十六

硃批李衛奏摺

雍正十二年正月初二日直隸總督臣李衛謹

奏為奏報歲朝瑞雪事恭惟

元旦佳辰乃萬彙之始而雪為五穀之精今保定地方於雍正十二年正月初一日丑刻起瑞雪繽紛至初二日子時晴霽約有五寸餘深天氣和暖浸

地融化之外尚積三寸新年開泰之初得此瑞雪
愈加滋潤士民歡慶倍常考之占候書云元日雪
百穀豐誠為嘉兆今逢歲朝瑞雪普降大地均霑
皆由

聖德日新敬

天勤民感格之所致也臣益當凜遵

訓諭倍加寅惕以期仰答

天庥上慰

宸衷理合恭摺奏

聞謹

奏

歲朝得雪且廣遠深透實屬稀逢畿輔郡縣之地皆卿
所轄慶喜之懷諒必同然也

雍正十二年正月二十六日直隸總督臣李衛謹

奏為陳明運河應行事宜以便次第辦理事竊臣於

封印期內前赴德州會勘河道事竣回署緣由業

經具疏

題報應侯山東撫

臣

岳濬等主稿另行會

奏請

旨遵行外第查運河上游直屬之故城等縣與東省之
德州衛并武城縣地界毗聯係河流東注轉灣之
處向未築有隄埝防禦惟憑崖岸高深可以遮護
內地設遇水發一時宣洩不及由灣底低薄之處
出漕漫溢直趨景州吳橋縣等處此兩省運河交

界各地方亦宜乘時一并料理整備

臣

因會勘之

便面與河

臣

朱藻撫

臣

岳濬等商酌彼此委員無

分疆界通身會同查勘將崖岸低矮殘缺者培築
高厚如有一律單薄地方勸諭民間僱築土埝量
給食米以工代賑頗屬一舉兩便至直隸山東運
河交接各州縣甚多犬牙相錯或以河底轉灣斜
角為界彼此錯綜混淆遇有命盜及沿河浮屍等
案互相推諉經歲不結亦應乘便將從前經界參

差之處勘定立牌並將零星交錯之所撥換劃清
各專責成方無歧誤又直境運河地勢蜿蜒輾轉
環曲原因當年漳河之水不藉運道出海以為停
蓄濟運防其驟洩淺塞之故但自導引全漳之水
歸運出海之後源頭勢猛多有漫溢之患一遇河
身曲折東衝西蕩難免潰決民田似又當因時度
勢擇河流激湍對頭大灣過甚難轉之處開通阻
礙既與兩岸田廬險工有益而水行地中亦於漕

運無誤矣以上三條均關運道民生臣雖與諸臣
乘便議及但未經

奏明不敢冒昧輕舉緣時屆春融又未便久遲貽誤
東作伏汎為此繕摺請

旨恭候

聖訓遵行謹

奏

所陳三條內惟開通大灣一說似不合宜不但徒費工

力無益且恐河身改直之後勢猛流急更易潰決也餘
照議施行

雍正十二年二月二十日直隸總督臣李衛謹

奏為恭報春雨及時早霈事竊照歲內三冬令節俱
得瑞雪普徧二麥均霑滋潤目下時屆春和土膏
既動東作將興春霖殊不易得今本月望日以前
已經連獲微雨復於十九日自午至亥甘雨綿密
高下均霑所及必遠臣隨遣人四鄉查看田疇直

透濕土麥苗菁葱滋長正可播種秋禾農民鼓舞
老幼歡呼無不感戴

皇仁二十日早不風而晴日色和暖節氣調勻實為今
歲嘉祥之兆誠所謂堯天舜日見於此時臣等躬
逢

盛世曷勝慶幸俟各屬報到得雨情形再為彙
奏外所有現在沾足緣由理合具摺奏

聞仰祈

睿鑒謹

奏

雨澤接續而來春麥秋禾兼資長養畿輔農民有賴矣
我君臣真堪共慶

同日又

奏為奏

聞事竊照直屬

畿輔重地山海交錯弭盜最為先務而賊蹤之出沒

詭祕實非常法所能勾緝臣自上年八月間旋署
選差弁兵捕役擒獲拒捕響盜李自洪等十數名
具摺奏

聞之後究出夥窩強竊盜賊各姓名住址外省本地百
有餘人或聞風潛匿或遁回原籍或結夥遊走為
匪隨陸續分頭設法躡緝并密咨鄰省協捕已得
十之六七其餘未獲者仍然分路差緝從此根究
窮追地方盜風或可望其衰息惟京東一帶強竊

容臣漸次設法探實來歷加意查拏斷不肯聽若輩漏網肆害地方有負職守謹將現經獲盜辦理

緣由先行

弭盜

有方朕素所嘉許

奏明再西面沿邊口內地方衆山環繞每年於交冬

後虎豹出入傷害人畜而紫荆龍泉關等處更甚所在兵民莫敢撓鋒即偶有獵戶亦不能深入搜捕臣上年巡歷邊境訪問百姓頗以為苦因思虎

患有關民命當即揀選弁目鎗手前往山內巡捕
既可稽查地方匪類亦得練習兵丁步力膽氣順
便協同教授各營自冬及春弁兵均知勇往陸續
共打獲猛虎十一隻金錢豹二隻分別獎賞人人
鼓勵毫無懼色此事雖屬細微緣差兵捕虎為民
除害恐有謂臣馬有是理大笑覽之性好遊獵騷擾多事轉有未便為
此一并附摺奏

聞謹

奏

捕虎之法莫善於犁刀藥弩等類舊有成式但須曉諭過往人民毋致誤陷機穽為要耳

雍正十二年四月二十日直隸總督

臣李衛謹

奏為恭報二麥情形伏祈

睿鑒事竊照直隸各屬地方仰賴

聖主福庇於上年冬間今歲春月連得瑞雪時雨前後
霑足現在二麥發秀暢茂秋禾播種生長惟是正

定以北數日以來地方土性稍乾幸無甚風沙雖
於收麥不礙然察訪農民秋苗望雨甚殷若在本
月之內得霈甘霖則二麥更可結實現在擇吉設
壇虔禱但臣從前在京曾經面奉

諭旨如遇地方雨暘陰晴必該隨時

上聞今覺微旱理合早為恭摺陳明伏祈

聖明睿鑒謹

奏

為此正爾殷憂若以去冬今春雨雪調順之兆揆之似不應有目下景象或朕與卿其間有過舉歟何遽然示斯轉變也當各返躬竭誠痛加修省以待

上天之鑒照耳

同日又

奏為遵

旨查議事本年三月初一日准理藩院咨開據喀爾沁札薩克多羅杜楞郡王和碩額駙伊達木札布等

呈稱准大部來文據直隸總督李衛咨稱八溝新
放同知應於買賣街市之東北蓋造衙門由院行
知本應遵行但濟伯格街西地方高埠平坦街東
窄狹又值山水下流總督李衛原已悉知強勒我
等蒙古欲占地方況西邊明有可以蓋造派官查
看便知我等內地札薩克惟賴地畝養生如再於
街東莊稼地方修蓋衙門度日必致艱難伏祈大
部

奏請停止等因摺奏奉

旨王伊達木札布所奏是李衛欲占蒙古地方建立同知衙署不是了爾部咨查李衛再行議奏欽此欽遵

臣
跪讀

諭旨不勝感激悚惶伏查八溝設立同知建造衙署一案先經都統拉錫以熱河八溝至喀爾奇河居住民五十餘萬耕種喀爾沁地畝之民亦有數萬聚集衆多雖有理藩院章京人員不能管轄

奏請州縣分管緣由荷蒙

特交議政王大臣會同喀爾沁王札薩克等詳議具奏
隨議定八溝附近三處喀爾沁地方設立同知查
管民人緝拏盜匪等事其衙署關係重大應派大
臣前往查辦等因覆奏奉

旨欽遵在案此八溝設立同知衙署原係喀爾沁王會
同議定之案旋奉

欽差內閣學士塞爾赫勘明八溝地方街西屬於通判

街東屬於喀爾沁有犯法者越境即不能擒治同知原為管理蒙古地方民人應建衙署於街東以資彈壓因係喀爾沁王所屬之地應咨理藩院知照并移臣會核具

題經部議覆准其建於街東之北應令理藩院行知喀爾沁王亦在案是八溝之新設同知衙署既經喀爾沁王會議於先後擇地建造復經內閣學士塞爾赫查勘明確工部議定知照歷歷檔案可據

竝非臣自立意見強勒蒙古況喀爾沁租種之地
盈千累萬衙署所需不過十數畝亦何致占其莊
稼地方必至度日艱難細查其故緣街東原有買
賣雜稅誠恐同知在彼駐劄之後將來設或爭管
其稅因而聽信人言慫恿所致殊不思

聖恩高厚愛養蒙古既周且渥即承辦此事者自當仰
體

皇仁亦斷不屑奪取微利有失政體除八溝街西之稅

仍照舊例令通判徵解外所有街東之稅應聽喀爾沁王自為派人抽收至同知衙署街西非無可以蓋造之地但已有通判分駐管理旗下莊頭民人街東係蒙古地方所設同知原為佃種蒙古地畝民人衆多起見且聚集日漸繁衍皆係北五省不守本分之人流移在彼姦盜詐偽無所不至必得所設同知駐劄彈壓化導薰改積習若以管理街東蒙古地方之官改駐於街西旗下莊頭不轄

之地間隔錯雜辦理未便將來諸事恐有掣肘難以管轄不得不據實陳明其同知衙署可否仍照內閣學士塞爾赫勘定街東之北建造抑或改於街西興造之處臣未敢擅專恭請

聖訓指示欽遵除照依咨明理藩院聽候議覆外所有前後案據來歷辦理始末情由理合繕摺

奏明伏乞

皇上睿鑒謹

奏

所奏甚詳朕已備悉喀爾沁王伊達木查布現在病中未免念慮恍惚但憫伊久困牀蓐姑宜曲從所請以慰其心俟該院議覆時斟酌有旨

同日又

奏為據實奏

聞事竊查直隸旗民雜處約束稽查有司難於周到荷蒙

特設旗莊官分路辦理若能實心任事甚為有益定例
任滿一年更換時分別保題叅奏臣既有考核之
責自應平時留心察訪而京南西路旗莊官清海
係原任兵部堂主事齊暖之子伊父生前與臣同
一衙門辦事久知清海少年放蕩招搖生事是以
上年到任管理旗莊之初臣即面加嚴切開導勉
勵看其舉動尚似知悔前非光景漸則故智復萌
恣意放縱聲名狼藉聞本年二月內清海躡知滿

城縣留馬村旗人范允善掘窰私燒差役查拏起
獲鍋甌范允善情極央懇差役回以非到黃村高
玉立家不能完結隨赴彼懇求許銀二百兩交收
免究不報又民人張雲鳳因伊子二存兒過繼旗
下高昇為嗣欲報入旗冊具控前任旗莊官發縣
審斷歸宗結案清海探知高昇家道殷實借端駁
查嚇詐銀數百兩亦係高玉立竝劉九甫與撥什
庫屈伸過付此件臣雖未見首出發覺聞已約會

赴京具控又青海與完縣居住旗官原任副將趙士儀聯宗立票借銀一百兩不允遂給與執照勒充旗下鄉長士儀聲言赴省告發方將執照當面扯碎徧處索詐毫無顧忌第思青海蒙

恩擢用不知感激報效輒敢遇事婪贓實為下愚不移本應即為露章入

告臣因事關受賄必得究明證見使其無可狡賴是以

密令各地方官就近再加核實俟覆到彙疏一并

叅究再有京西路旗莊官飛揚古衙門書役張宏
瑞等通同地棍包攬私燒索詐涑水縣民人楊七
廣等四家共得銀三十二兩雖據飛揚古自知難
掩人口具文首報而張宏瑞等堅供係飛揚古查
追此銀必令交齊送署因彼處私燒尚多交銀無
幾所以押發呈報其果否通同徇縱網利分肥之
處已據呈批發臬司審明再為酌定又聞得京北
東路旗莊官拉漢泰聲名穢鄙亦屬不好但尚未

得其的實容逐一細察分別叅處外理合先行據
實密

奏再目下直屬奉有部行清查各項入官地畝其中
多年錮弊頭緒紛繁實非旦夕可以徹底完結者
現在酌議委員會同各路旗莊官秉公清釐必得
賢員實心查辦方為有益而現在旗莊各官更為
要緊此清海等三員即間有輕重之分亦均不能
信托斯任以期辦理妥協者也合并附摺陳明伏

候

聖鑒謹

奏

此奏嘉是覽之查明實據嚴行究叅以懲無恥玷職之輩已有旨命該旗另揀賢員更替青海等三人矣

雍正十二年四月二十八日直隸總督臣李衛謹

奏為恭謝

天恩事竊臣於四月二十二日齎摺弁員捧回

皇上特賜到臣蘇合寶香一盒

御園櫻桃一簍隨即出郊跪迎至署恭設香案望

闕叩頭謝

恩祇受伏睹奇香殊質已叨溢格之榮而櫻桃鮮品

賜食外臣更為難逢臣何人斯而獨膺此

曠典且跪讀

硃批開誠訓示感深肺腑不禁涕零臣撫心自問愚魯

粗疎無一事不上邀

睿照無一時不仰荷

優容而一物之美一味之甘復蒙

垂念下頒戴高履厚之

恩實有口莫能宣而言莫能罄者惟有永矢丹誠始終
奮勉稍盡職分於萬一而已理合恭摺

奏謝伏乞

聖鑒謹

奏

覽奏謝矣近日每有人在朕前進萋菲之言大抵皆謂卿任性使氣動輒矢口肆詈云云謹言之戒朕屢經諄訓不啻再三丈夫立身行己於此等小節不能操持尚何進德修業之可期向後當竭力悔改時自檢點勤加從容涵養之功漸融粗猛傲慢之習則謗毀不弭自消矣惟口出好興戎可不慎諸

同日又

奏為請酌定戰船更換蓬索事竊查天津水師營船

需用蓬索從前議定一年一換原為北方風土高燥易於損壞立法未嘗不善臣思直隸雖與東南地方不同繩索用過一年磨擦朽爛自不能免若風蓬一項係竹蔑編成尚屬堅緻綿密商民船上零星修補有用至三四年不弊者全在看守戰船之人加意愛惜照管甚益隨時曬晾即稍有破損均可修整應用况物料匠工產自南方每年差員遠涉購辦往返頻煩且通計風蓬三十二副更換

一次正價津貼連賠墊腳費盤攪等項約用銀二千餘兩今請嗣後天津戰船除繩索仍照舊例按年添換配用外所需風蓬定為隔年一換其停換之歲應用小修物料即令隔年更換赴南採買風蓬便員酌量帶回收存將用過銀兩統入次年更換工料內一併分晰造冊報銷如此間年一換一修戰船之駕駛既得無誤而錢糧亦免致糜費是
否可行伏乞

聖明訓示以便具本

題明為此繕摺請

旨謹

奏

所請甚是具疏題來可謂無微不至心力朕實嘉卿之勤而憐卿之勞也

聞保安衛莊頭霸佔民地該州瞻徇情面聽斷不公致令小民負屈等語留心嚴加察處且聞州牧居官亦甚

屬平庸果若然當即行叅劾以警不職

雍正十二年五月初七日直隸總督臣李衛謹

奏為

聖澤至深極重臣承荷難勝恭摺

奏謝

天恩事本年五月初二日臣標把總自京齎捧

皇上批回原奏摺匣

欽賜臣香囊寶丹到署隨恭設香案望

闕叩頭祇領

恩賞跪讀

聖訓感激悚惶一時汗流浹背不知此身此世何以得蒙

聖明鑒照矜全至於如此之周也伏念臣本質愚戇心直口快即屬官中從無一語輕於肆詈何況他人惟嫉惡過嚴凡遇公事即覲面相對不肯依違曲從或遇有心鈎探藉以進身之人但能隱而勿答

若問之不已則於是非二字從未慣粉飾虛詞言不由中再加添出枝節駕辭聳動結恨益深此實臣一生招尤取禍之大病久蒙

皇上洞鑒屢賜

教誨臣朝夕服膺不敢暫忘今忌臣者同心附和即以
此漸入其罪且彼此聲援多設巧法排擠冀以傾
陷若非仰邀

聖主日月照臨之明天地覆載之恩開誠

指示諄切儆戒臣被獲重愆而不知所由來惟有循誦御批一字一淚務期竭力改革以仰副

聖訓於萬分之一耳再臣忝在地方戰船風蓬分宜慎

重複蒙

天語矜憐臣心更切惶愧現在酌核另

題所有微臣欽領

恩賞多珍合家頂感竝凜遵

聖訓緣由理合恭摺

奏謝伏祈

慈鑒謹

奏

覽奏謝知道了前摺所諭卿矢口詈人之處據云從無其事或出於有心鉤探駕辭傳布若然第一須防鼓弄唇吻之輩譬如有人來告某某退有惡言於此即當逆察其情是來也果出於真誠耶抑或激我之怒竊記我語復以播揚於人耶審思而明辨之庶免墮其術中倘

一被所愚窺伺者接踵而至朱紫混淆涇渭莫分矣古人有言止謗莫若自修必也毀譽不動於中喜怒不形於色能具此等襟懷方得受用否則滿腔冰炭苦曷可言哉

同日又

奏為覆奏事竊_臣於五月初二日蒙

皇上發回奏事摺內欽奉

硃批諭旨聞保安衡莊頭霸占民地該州瞻徇情面聽

斷不公致令小民負屈等語留心嚴加察處且聞州牧居官亦甚屬平庸果若然當即行叅劾以警不職
欽此仰見

聖明推誠委任敢不秉公詳察辦理隨檢查案卷有莊頭衡任與惠晉爭控民地一案乃上年九月戶部提去審供不一復發出行臣衙門轉查者但其事

人地俱在西寧萬全非屬保安又係蔚州知州李培仁西寧知縣常三書會審近經臣批駁未曾結

案現任保安州知州羅梓從未經承審似與此案無涉惟再查上年六月內又有戶部准內務府莊頭金復憲控告民人徐惠等霸占官地移咨到臣轉行飭審一件則係保安州之事細查金復憲係已正法莊頭金復暉之弟即衡有爵之孫故稱為衡莊頭雍正三年金復暉在日與徐惠等赴戶部許訟行提兩造進京訊審將淤地全行斷歸金復暉至雍正五年徐惠等復於巡察御史苗壽陶正

中處控告批州提審而金復暉始稱所管淤灘內
原有餘地情願退還具呈前任保安州趙荃詳覆
巡察御史批准給還徐惠等管業今伊弟金復憲
又不守本分赴戶部復控行查現任知州羅梓於
本年四月內前往查丈東西兩頭俱已勘定無有
爭執惟當日原退四至內稱南從清水渠向北八
十步等語因此渠係弓背樣式在官則以靠河邊
往北俱應丈還八十步在民欲東西居中取直再

向北八十步則所剩月牙之地又可多得是以未肯出具遵依該州尚未具詳定界但臣查此案羅梓於本年三月間詳覆藩司文內即稱從前莊頭占有民地不問可知並非徐惠等霸占官地已屬顯然等語則亦將此地斷歸民人其無瞻徇明矣至該州羅梓雖無長才聲名中等人尚老成操守謹飭近緣霸州員缺營田水利緊要一時不得相宜之人據布按二司保詳於四月二十二日將羅

梓

題請調補現在恭候

欽定若經引

見是否劣員

聖明自必洞照無遺伏讀

諭旨果若然即行叅劾以警不職是

聖明原令查實而行何敢因已曾

題調霸州稍有回護瞻徇合將其中情節據實先行

覆

奏伏祈

睿鑒謹

奏

前摺批諭甚明此事原係偶爾風聞非有深知灼見也
第秉公為之

雍正十二年五月十五日直隸總督臣李衛謹

奏為恭報得雨日期收麥情形事竊照直屬入夏以

來自正定府之北稍覺亢旱民間望雨五月初旬
各處雖報有得過一二寸者因未獲霑足不敢頻
為瀆

甚是

奏目前二麥現在刈穫之時去秋早種者收成有八
九分今春晚種者收成畧次而正定以南歷來多
係冬麥且曾偏得春雨所收更稔至於秋禾今尚
未覺大旱然亦待雨正殷臣等遵

旨竭誠修省屢次虔禱自五月十四日丑時聞有雷響

漸霈甘雨臣隨起視時住時降共有十餘陣直至
辰末方止踏勘郊外四野雖僅有三寸入土而禾
苗蔬菜百物悉得滋潤起來之後更可播種豆黍
今經雷雨之後地氣已舒風沙頓息現在濃雲復
布看來尚有接續之象若得再霈甘霖更為有益
其各屬路遠之處容俟報到再為彙

奏外臣仰體

天心念切民瘼時屢

聖懷合先具摺恭報伏乞

睿鑒謹

奏

目今雨暘情形覽奏已悉

賜來悅心集一部係向所選集近始刻成者公務餘暇
時一展對頗可悅目清心朕及卿輩繙閱此書大似山
僧野客觀覽朝報而談時政殊為越分妄想每一思之
不禁失笑

同日又

奏為請

旨事竊照宣化府東路同知谷確奉

旨陞授口北道所遺員缺著

臣

揀選題補遵與藩臬二

司悉心詳慎選擇惟是宣化地處邊陲同知分駐

新保安緝捕彈壓責任亦重且常有差委口外事

件必得強幹有為善於乘騎之人方克勝任現在

直隸補行

大計案內雖有卓異知縣四員候

旨欽遵但各官原籍俱係南方騎馬不甚便捷茲見各省卓異官內有仁和縣知縣董怡曾已經引

見奉

旨允准回任候陞本省既未指名請留備用將來陞轉別處總須離浙查該員係河南舉人性情直爽任事誠實且嫻於乘騎與宣化府東路同知之缺甚屬相宜可否

賞補抑或准臣指名

題請未敢擅專合先具摺請

旨伏候

訓示遵行謹

奏

覽奏已悉候另旨諭部

同日又

奏為據實奏

聞事竊查熱河等處地居口外疆界遼濶旗漢蒙古雜處添設知州等官正欲其稽查匪類安緝兵民始於地方有益乃新設承德州知州裘君毅自陞補以來器小易盈諸事放縱初因其尚有微才屢加申飭冀得改悔不意日漸恣肆任意妄行倍勒火耗婪贓縱盜不一而足又與熱河總管巴什結聯甚密因巴什係熱河大員該州冀其隱蔽惡端并望可以徼倖保薦遂曲意逢迎諸事稟明方行卑

汚屈節中途相遇竟在當街以一足屈膝請安全
無五品民牧之體而巴什則以知州有管理地方
權柄怒者可以囑其朴責洩忿喜者可以向其說
情得錢擅作威福亦遂引為心腹至巴什雖與臣
不相統攝但於便中訪其行為於上年八月內曾
委千總陳宏亮等六員前往各莊查點戶口凡舊
莊頭七十七名每名勒費銀十二兩新莊頭五十
三名每名勒費銀二十四兩共得銀二千餘兩聲

名甚為狼藉除將知州裘君焱劣蹟詳細列款具
本

題叅外其與巴什結聯朋比情由未便入疏但既有
所聞亦不敢避怨隱諱相應據實附摺奏

聞伏祈

聖明再加訪察乾斷施行謹

奏

裘君焱婪贓縱盜理應嚴行叅黜至於巴什原係糊塗

寡識之人與地方官聯結擅作威福容或有之若謂營私納賄尚恐未然或因其於熱河一切處過為嚴刻小人懷怨從而誣捏之辭亦未可定當再加詳細體訪具奏以聞

雍正十二年五月二十四日直隸總督臣李衛謹奏為奏

聞事竊照本月十四日得雨情形業經臣於十五日早具摺恭

奏彼時即見濃雲四布本日以及十六復接連雷雨
數次隨據順天保定河間天津及深定易等各府
州所屬陸續報到於此三日之內得雨者已有六
十餘州縣查入地皆深三四五六寸不等看來各
處高下多有霑透濕土可以播種豆黍目今糧食
價值俱減麪亦甚賤若於十數日內再得甘霖接
濟則徧植晚禾更為有益惟順德府屬之平鄉任
縣趙州屬之隆平縣冀州屬之衡水縣報有零星

蝗蝻生發皆稱每處止有二三村莊撲滅將盡臣
恐尚有不實不淨并隣近曾否蔓延當即飛行各
該文武嚴飭會同上緊撲捕委員督率查勘毋使
稍留餘孽去後續據大名道府稟稱元城縣與山
東冠縣館陶接界之處亦報有蝻子隨即委令通
判等官星往會勘乃係草內所出土螞蚱尚非蝗
蝻一種現在撲滅臣復令藩司委員分頭再加確
勘倘各處稍有懈怠捏飾推諉等弊即當據實分

別叅究斷不敢代為隱諱貽誤地方也事關民瘼
合先具摺奏

聞謹

奏

續經得雨霑透糧價俱減深慰朕懷蝗蝻一事料卿自
必督率屬員竭力撲滅不需朕之訓飭也

同日又

奏為恭謝

天恩疊沛事本年五月十七日臣標把總自京齎捧

硃批奏匣

欽賜臣悅心集全部到保隨郊迎至署望

闕叩頭謝

恩祇領竊臣荷蒙

殊恩特賜祕笈跪讀

硃批敬繹

聖序仰見

皇上龍潛藩邸隨境而安澹泊寧靜久留

睿思平時紀錄猶勤

御覽於邇言淺近之中闡遠大高深之蘊靜則本體虛
靈含太和之元氣動而因物感應皆天理之流行
不思而得無為而成

聖學淵源包羅萬有伏讀集中如黃洽之矢不欺林逋
之戒沽名邵雍之勉為善司馬光之勸知足皆古
來名臣大儒以忠君愛國之心抒樂天知命之致

其他單詞片語無非祛妄止貪不同晉人清談惟
誇曠懷逸志實為覺世名言修身至寶

皇上以之涵養

聖心即以之

教訓臣下使氣質化於和平性情歸於恬淡如臣粗浮

更同針砭豈惟悅目清心叅詳醒悟實在鏤肝刻
骨體驗祇循以期稍得萬分之一耳理合具摺恭

謝

天恩臣臨奏曷勝感戴瞻依之至謹

奏

覽奏謝之辭極有解悟若能如是領會將來與體究本分處甚屬捷近

雍正十二年六月初三日直隸總督臣李衛謹

奏為奏

聞近日雨澤情形事竊臣於六月初二日據各屬俱將

五月二十九日得雨情形接連具報內良鄉縣密

邇都城已報霑足則在京定得甘霖可知其附近
保定各處大小不等如容城廣昌俱有五六寸易
州新安則皆四五寸其涿州房山定興安肅衡水
保定縣霸州雄縣亦各二三寸此外尚有未經報
到者臣委員各處不時查看俟續有時雨普徧另
報外至前奏平鄉等五州縣偶生蝻子臣委員星
飭撲捕已據平鄉任縣隆平冀州衡水俱報撲淨
至衡水等縣交界之深州寧晉續報草地間生蝻

種該處文武業經竭力會捕具有消除印結呈送

其山東之臨清德州並衛地亦有蝻子生發臣與
於卿前奏到日適聞東撫岳濬奏摺即經批諭令其督
查會捕今復接卿咨移自必協力同心共襄此役也
界設法協捕可望消除合併附摺陳明上慰

聖懷謹

奏

覽

同日又

欽定四庫全書

硃批諭旨

三十四

奏為恭報二麥實在收成分數事竊照直隸二麥收成分數經臣確查去後茲據各道府州陸續呈報前來臣查直屬地方凡去年早種之秋麥今歲收穫實有八九十分惟遲種之春麥分數畧減但種麥盛於往年又皆秋麥為多故牽算分數比舊為豐順天府屬實有八分七分并京東五六分不等保定府屬實有十分九分并六七八分及五分不等永平府屬實有九分并七分不等河間府屬實

有十分九分并六七八分不等正定府屬實有十分九分并六七八分及五分不等順德府屬實有九分八分并五六七分不等廣平府屬實有十分九分并六七八分及五分不等大名府屬實有十分九分及七八分不等天津府屬實有八分七分并六分不等冀趙深定四州屬實有十分九分并六七八分不等易州所屬實在收成均勻足有八分宣化府屬地氣稍寒收穫較遲至今尚未報到

現在催取另行覆

奏外所有已據各屬申報二麥實在收成臣謹

恭摺奏

聞謹

奏

今歲麥收猶得如是分數朕心甚慰但目前雨水尚屬多寡不均為可慮耳

雍正十二年六月初十日直隸總督臣李衛謹

奏為瀝陳實情仰祈

睿鑒事竊臣於本月初九日准戶部咨初八日

奏准提解鹽案內朱大雅等三名臣隨令臬司委官
管押赴部投交外但此三人從前行提訊供緣由
有不得不直陳於

聖主之前者查朱大雅原係王惠民心腹密交而朱眷
西黃快亭則係惠民承值衙門奔走夥計臣初因
張愷唆聳梁樟挾制王惠民行私侵課之弊聚衆

打架攘奪引地惠民見已敗露徧處營求央人代
奏借以資本交出官辦為名而將百十萬私鹽帑銀
影射掩飾臣身在地方既有所聞恐被脫漏是以
前次附摺陳及大槩彼時尚不知投定何處聲明
再為詳細奏

聞續於四月初二日據梁樟遣子抱呈在臣衙門具控
內有王惠民二月內賄囑鹽政竟蒙摺奏蒙商朱
大雅可審等語詞內指辨之詞似乎見過底稿非

係揣摩影響且公然開入告詞臣不勝駭愕伏思
梁樟一介小人鹽政曾否代為摺奏伊何由而知
若係霹空假捏其罪尚輕否則負販棍徒竟能探
聽密摺消息所關匪細是以摘調朱大雅等三名
面訊其中緣由後准戶部咨提人卷進京察審隨
將梁樟原呈一并送部此內方有朱大雅之名竝
非原案正犯也朱大雅等於到保時臣止一人密
問虛實竝無衙役刑具在傍而伊老姦巨猾轉將

上年春夏二次鹽院先後令向王惠民要去現銀
五千兩係大雅傳諭朱眷西交送堂上周管家收
進之處俱各隔別供認鑿鑿詰問其如何甘心冒
險代為隱瞞百萬帑課轉

奏之故則稱王惠民因張愷梁樟等爭奪氣惱成病
著人叫他兒子王至德於正月十六日到天津父
子商量要進地方是王至德自己進去求鹽院的
如何面說不曾知道等語臣以此案續蒙

皇上交戶部王大臣察審自能秉公是以止將朱大雅等三人暫留靜候部審如果課餉不至朦蔽再為奏明完結乃於五月二十九日忽接戶部行提朱大雅等之文惟開案內有人供出並未指明提質某事此臣所以咨部請將何等情節應質之處開示即當訊取確供送部斷不遲誤正案去後今戶部止將送部原案內開有豪商朱大雅可審字樣具奏請提而原呈此句之上尚有賄囑鹽政竟蒙摺奏

等語截去不入原案在部可據而梁彭年初則親身告狀開朱大雅為審證之人今則變為主使借名誑騙預埋送銀不足為憑出脫地步其意顯然可知

聖明在上纖微必照將來朱大雅等到部訊斷公私自畢露於

日月之照臨也

臣撫躬自顧若非恭逢

聖主則半年以來一身不知作何底止今明知又有此

奏結怨更多但實不忍聽其朋比隱瞞恣行於

光天化日之下謹將京東八處作弊營私緣由另繕清

單

進呈

御覽仰懇

聖主將此件密為

留中俟定案時查對情節是否相符俯賜

乾斷但期於

國家公事有益臣之身家俱不敢計及也臨奏曷勝
戰慄悚懼之至謹

奏

所奏朕殊不以為然因此案從前在保審理甚不妥確
是以特旨交果親王提內訊鞫該王居心虛公非汝輩
大臣所能企及審明自有定論朕於一切事務從不以
先入之言為準若離是是非非之外別有是非天下無
此情理豈汝輩凡夫俗子妄以人我心揣摩而可窺見

者

雍正十二年六月二十七日直隸總督臣李衛謹

奏為奏

聞甘雨及時復霈事竊臣於六月初十日將近京各屬

所得透雨日期具奏并聲明畿南四府俟稟到另

報續於十一十二等日連朝有雨數百里內高下

無不十分透足西北各府及京東等處所報雨澤

日期亦各大槩相同即畿南正順廣大四府屬各

稟稱六月初九初十之雨四處均霑十一十二
六十七等日亦續有時雨節次所降有至一尺及
七八寸不等者均可播種惟正定屬之井陘獲鹿
二縣雨未透足今保定省城於二十五日夜子時
起靈雨繽紛至二十六日巳未暫住陰雲尚濃看
其漸漬稠密之狀所及必遠臣親歷郊外目見大
田早禾茂盛非常行將秀實晚禾嫩綠得此甘霖
更覺潤澤勃然興發穎粟可期總緣

皇上躬親祈禱誠敬格

天是以先從京師次及保定由近而遠以至各府均得霑
被此其明驗億兆蒼生皆仰邀

聖主之福庇也為此謹

奏

宣郡一帶地方缺雨何未言及然此非彼處文武大員
所奏乃出自過往行人傳說之口總之今歲雨澤不均
即京城左近目下亦尚覺乾旱

同日又

奏為覆奏事竊

臣

前因平鄉等七州縣偶有蝻子生

發附摺奏報荷蒙

聖訓設法撲捕當即遴遣標員并同知通判等官分頭
前往督同地方文武上緊掃撲旋據先後回覆皆
已淨盡出結申送惟山東交界之直隸清河縣地
方并獻縣隆平三處尚有數村莊蝻種續生者緣
係初長未成現在撲捕不日即可盡除至六月初

四日宣化府屬之宣化縣保安州蔚州蔚縣懷安等五州縣於雨內帶有冰雹經過村莊間有十里數里之寬幸二麥已收高糧早穀根本堅固稍去其葉可以發生尚無甚損惟豆子畧有打傷亦可補種晚禾又廣平府屬之永年縣於六月初六日陡起大風數刻吹坍府學之櫺星門及城垛數處民間草土舊房亦有倒塌者以上各處些須偏災雖然無多

臣

即委員飛馳前往勘查將被傷豆地

借給籽種工本催令及時補植倒塌房屋之家分
別輕重給銀撫恤并量動社倉穀石借給資助不
令稍有耽誤時日外為此一并附摺奏

聞伏祈

聖鑒謹

奏

據奏永年縣大風乃俗所謂羊角風無足怪者但時值
盛夏為不合耳

雍正十二年七月初四日直隸總督臣李衛謹

奏為覆奏雨澤情形事竊臣跪讀

皇上發回前奏報雨摺內欽奉

硃批宣郡一帶地方缺雨何未言及欽此仰見

聖主時刻以天下民生農事上厯

宸衷伏查宣化府屬各州縣據報內有五月中得雨六
次六月內得雨七次者其間大小多寡不同尚未
見缺少惟附府之宣化縣及張家口之萬全縣二

處較別屬雨未透足續於六月二十三日得雨一
陣而臣二十七日摺奏之時未據報到是以未曾
聲說今二十五六七等三日之雨所及頗廣各處
透足獨萬全入土五寸宣化縣僅有寸許幸先有
二十三日之雨大田無礙晚禾亦可補種且彼地
氣候較遲猶不為晚但盼望甚殷今現在各處紛
紛報雨與此二處同府者已到此際諒必均霑臣
前奏少雨之獲鹿井陘二縣續已報稱二十五六

七等日獲鹿業經透足并陞於兩日內得有七寸
趕種無誤惟平山係高阜之地從前雖屢經報到
尚在待雨亦同日得有五寸此外通省具報此三
日內得雨者共又有七十七州縣今七月初一日
午後微雨初二日亥時起密雨連綿至初三日戌
刻方住更可冀其普徧從此止慮過多不虞乾旱
正因大小不一恐有不普之慮耳
總之今歲雨澤但有大小之分而時時接續四處
均霑是以早田既盛晚禾復廣米糧甚平人心安

樂黃童白叟無不歡欣鼓舞實有豐登之兆非臣
所敢稍有粉飾也合將現在地方情形據實覆

奏上慰

聖懷謹

奏

覽目下情形朕懷稍慰

雍正十二年七月二十日直隸總督

臣

李衛謹

奏為奏

聞近日地方雨澤年景情形事竊臣自七月初四日具摺

奏報初二三等日得雨後隨據通省遠近各州縣報

到此二日內又有雨者共六十三處續有保河津

順廣大六府各屬七月初六七等日復有大雨即

正定之平山縣前覺微旱者初六日亦得霑足宣

化所屬各州縣皆有雨近聞宣化一帶甚旱即惟宣郡府城及萬全縣

早晚得雨補種已屬無及留心確查先事綢繆可也張家口尚缺而該府所報此二處夏收旱田約畧

亦有六七分於向年尚未為減少若於數日之內
得雨晚秋可望今於十八九日又得密雨各處透
足若宣化等處此次亦有甘霖則收穫仍可無礙
今歲營田州縣稻田禾苗極其茂盛木棉結秀異
常較往年更好數倍各處窪地種植者亦從未有
如今年之多而且盛四郊彌望滿目芄芄實為可
慶至各屬有上年被水窪地草萌之中遺有魚子
在內夏秋日曬氣蒸雖間有化為小蝻與向日土

產之草螞蟥攪雜生出臣預飭留心撲捕分遣標
員督催陸續俱即消滅除已經具結報到外現在
止有河間獻縣交河等處悉稱不日可淨近日順
天府屬之香河大城永清武清以及大興宛平亦
有數處村莊報有生發俱係零星參錯幸未成片
段且禾根莖葉皆已堅結不能為害臣分遣員弁
極力督飭屬員務令撲盡無遺督同地方文武上緊掃捕尅期務淨現據大興縣
已報撲滅其餘諒不致上厓

聖懷為此繕摺奏

聞伏祈

睿鑒謹

奏

覽

同日又

奏為奏

聞事竊臣於七月十七日考官公出回署街傍突有一

人跪稟口稱投到領罪觀其形似求乞告狀之人
隨交中軍官帶回盤問覆稱聽其語言初似癡癲
移時又有頭緒據供本名孟輔世係陝西漢中府
南鄭縣民父故母存小本貿易上年八月二十日
曾在蘭州監督廳上書失實隨即鎖拏呈請巡撫
布按於二十四日發文解回原籍本處正法行至
褒城縣地方將解役灌醉脫逃在外各處盤詰無
可容身特來投到聽候解回治罪行文原籍知照

等語并繳出在蘭州所上書稿及說單二紙臣看其單稿內有狂妄悖謬之語罪不容誅但止法必奉有

諭旨據稱八月二十日投書二十四日即解回本處止法數日之內焉能即奉到

明旨如是之速則所供顯有荒唐難信之處除飛羽密咨署陝西督臣劉於義甘肅撫臣許容查明所供虛實是否潛逃重囚外現將該犯密交按察司牢

固監禁相應據實奏

聞竝將原繳單稿固封進

呈伏候

諭旨訓示庶便嚴究情由置之大法以為妄誕悖謬之

戒謹

奏

將該犯投到自願領罪情節備叙移文遴差管押解送
陝省聽該督撫審結可也

雍正十二年七月二十五日直隸總督臣李衛謹

奏為奏報宣化近日得有透雨并覆現在預備緣由

事竊臣欽奉

硃批諭旨近聞宣化一帶甚旱即早晚得雨補種已屬
無及留心確查先事綢繆可也欽此仰見

聖心無微不至臣身在地方敢不凜遵料理查宣化十
一州縣除別屬先俱陸續有雨外惟宣化萬全二
縣七月內實為少雨懷來延慶州次之腹裏鄉村

平坦田地從前得雨之時先經種植自張家口以至延慶一路多係山岡地土燥烈未得播種頗有亢旱情形今據報於本月十九二十兩日連得大雨已種者雖減分數收成可期未種者節候已遲誠如

聖諭補種已屬無及只可乘時急下秋麥為來歲夏初之計現在宣屬別處米價尚平惟宣化縣張家口米價少昂猶幸宣屬今歲穫麥比往年稍好且彼

地又有一種夏收豌豆胡麻等項雜糧目前儘可支持惟慮冬春之間米價過長須得預籌接濟

臣

於六月底已令宣化府將存倉屯米在於府城減價平糶兵民頗屬相安其張家口先據該同知以存貯日久請將倉米糶價

臣

因彼時米價尚平飭

令暫存今正可酌量接濟查宣屬地處邊陲山高路峻別屬米穀難於遠運惟本處所貯米石猶可酌量轉移今查宣化縣存倉各項共合米三萬一

千餘石除現在應需兵米等項約一萬一千四百
餘石再留來春備用米數千石外實存米一萬數
千石在於本地平糶可以敷用其萬全縣雖有存
米合算三萬二千餘石而彼地所需兵米行糧數
約二萬之外尚有別項需用民食實有未足但張
家口同知所存雍正六七年採買之米以及所存
通倉運去陳米等項之內若移緩就急尚可通融
不足者暫於附近處所再為設法撥運目今保定

一帶自二十日奏報以後連日密雨時作時止直至二十五日始見晴意所及必遠諒宣屬於此數日內仍有雨澤普霑足以仰副

聖主痼瘼一體之

睿懷也為此謹

奏

宣府連得透雨已據補熙奏聞矣

硃批諭旨卷一百七十四之十六